



Mjez hosćimi swjatočneho přepodaća noweje Ralbičanskeje pěstowarnje běchu hłowny twarski nawoda Rainer Dittmer, wjesnjasta gmejny Ralbicy-Róžant Hubertus Ryčer, krajny rada wokrjesa Budyšin Udo Witschas (CDU), nawodnica pěstowarnje Jadwiga Nukowa, sakska statna ministerka za infrastrukturu a krajne wuwice Regina Kraushaar, zapósłanča Sakskeho krajneho sejma Elaine Jenčec (wobě CDU) a přirjadnica krajneho rady dr. Romy Reinisch (wotlěwa).

Foto: Jan Kral

Dom zboža a wjesela za wšěch

Nowa Ralbičanska pěstowarnja swjatočnje přepodata

Ralbicy (JK/SN). „Njech je tuta nowa pěstowarnja na znajmjeńša přichodnych 40 lět dom poľny wjesela a zboža“, tute přec zwurazni sakska statna ministerka za infrastrukturu a krajne wuwice Regina Kraushaar (CDU) minjeny pjatk składnostnje swjatočneho přepodaća noweje Ralbičanskeje pěstowarnje. Wona bě ni mo krajneho rady Uda Witschasa (CDU) a zapósłanča sakskeho krajneho sejma Elaine Jenčec (wobaj CDU) prominentny hosć mjez mnohimi dalšimi. Zdobom chwaleše wona konsekwentnu prócu gmejny, nowu pěstowarnju natwarić, jako wuraz regionalneho a narodneho wědomja a zamoľwitosće za towaršnosć.

Ijeje wuprajenjam přizamkny so w postrownych słowach krajny rada Witschas, mjenujo pěstowarnju źorło dorosta za towaršnosć a hospodarstwo. „Před lěta mi smy trjebali džělowe městna, nětko trjebamy džělowe mocy. Tuta pěstowarnja móže być jedne źorło za přichodnych fachowcow a člonow regionalneho žiwjenja a hospodarstwa.“ To podšmórny tež wjesnjasta Hubertus Ryčer (nje-

stronjan), kotryž widži pěstowarnju jako móžnosć, młodych ludźi w domiznje dźeržeć abo jich zaso do domizny wabić. „Jako najmłódša gmejna Sakskeje mamy česćelakomnosć, to tež wostać a pěstowarnja je jedyn garant za to“, wón rjekny. Zdobom zjima hišće raz njeruny puć, kotryž je gmejna kročić dyrbała, zo by so tutón són spjelnił a džakowaše so wšitkim akteram, politikarjam runje tak kaž gmejnskim radžičelam, kotřiž njejsu nadźiju spuščili, zo so tutón naročny projekt poradži.

Postrownym słowam, kotrež buchu po witanju přez nawodnicu pěstowarnje, Jadwigu Nukowu a wjesnjastu přednjesene, slědowaše program přichodnych wužiwarjow pěstowarnje. Woni ze spěwom a reju swoju radosć nad nowym domicilom zwuraznichu a přec promimentnych hosć podšmórnychu. Přjedy hač bu jako wjeršk dnja bančik přetřiha-ny, požohnowa wosadny farar, Scěpan Delan, nowotwar a přitomnych a pokaza w krótkich słowach na kruty zwisk mjez narodnosću a nabožinu, kotryž ma tež w

nowym domje knježić. W derje zestajenych próstwach zwuraznichu starši, kublarjo a džěci swoje přeca a wočakowanja na žiwjenje w nowym domje. Hdyž so tute spjelnja, budže dom zawěrnó dlěje hač 40 lět wěsta a wjesoła městnosć wjesneho a gmejnskeho žiwjenja.

Po swjatočnym přepodaću domu wjedžeše wodźacy projektant a twarski nawoda Kamjenskeho inženjerskeho běrowa Rainer Dittmer hosći po domje a jim wšitke wosebitosće a nadměru dobre wuhotowanje rozjasnješe. Wšitcy hosćo, wosebje pak ministerka Kraushaar bě wotwarje a móžnosćach přemóžena, kotrež so kubljanju a hladanju džěci wot žlobikoweje hač do předšulskeje staroby skića. Wospjet wuzběhny wona tež wažnosć kublarjow a kublarjow a so jim za jich angažement, wosebje tež na polu dwurěčneho kubljanja džakowaše.

Po prominency móžachu tež starši a wjesnjasto dom bliže zeznać. Wšitcy č, kotřiž pjatk k tomu składnosć měli njejsu, móža sej dom jutře wot 17 do 19 hodź. wobhladać.